

Was merr su babbeld

Honnes, kimmsde mol? Honnes?
Ja, ja, was iss?
Wo mächsden widder erum?
Was kreischsde su?
Donn gebb wenischdens Antwort.
Habb isch doch. Was iss?
Ei wo bissde donn?
Im Heizungskeller.
Was mächsden doo?
Isch kumm gleich enuff.
Doo bissde joo.
Was iss?
Was hosden im Heizungskeller gemacht?
Heizungswasser noochgefilld.
War dess notwennisch?
Ei sunnst hädd ischs nitt gemacht.
No ja.
Was heeßden dess: No ja?
Dess häddsde schunn längst mache misse.
Jetzt isses gemacht. Warum hosden gerufe?
Du kennst merr mol helfe.
Was hosde donn?
Fädel merr mol den Faddem oi.
Wo oifädele?
Ei hier in die Nähnoodel.
Gebb emol her. Dess iss schnell gemacht.
Wennde moonst.
Ui jeh!
Was iss?
Isch seh dess nitt.
Isch joo aach nitt, trotz dere nei Brill.
Muss dess soi mett dem Fadem?
Isch will ebbes nähe,
... unn doo brauchdsde die Noodel?
Ja. Awwer ich finn dess Noodelöhr nitt.
Hm. Isch holl emol e Lup. Hier isse.
Hall merr die emol.
Willst du dess mache.
Ja. Hall merr mol die Lup.
Su gut?
Naa, näher droo. Jetzt weider.
Isses su gut?
Naa, du wackelst su vill.
Merr iss nimmi de Jingsde.

Babbel nitt, hall ruhisch.
Mach isch. Kriehsdes nitt hieh?
Naa. Ich finn oofach dess Noodelöhr nitt
Dess iss aach kaum ze seh.
Wo giehsden hieh?
Onn de Laptop.
Was willsden doo?
Gugge wie merr oifädele dut.
No ja, donn gieh mol. Druck merrs aus.

Hier: Vier Methoden zum Einfädeln.
Ja, ja.
Was iss, wo giehsden hieh?
Die Nähmaschin holle.
Hosde de Faddem in de Noodel?
Ei ja.
Wie hosden dess gemacht?
Isch habb onn de Heilische Antonius gedenkt.
Ja, wie de dess immer mache dust ...
...wenn isch was suche due, ja.
Unn was donn?
Donn habb isch dess Noodelöhr gesucht unn
aach gefunne.

Eiern Honnes